

後村先生大全集

四四

後村先生大全集卷之一百七十七

詩話續集

朱氏感興詩第七章以唐經亂周史答歐陽子卒章
曰侃侃范太史受說伊川翁春秋二三策萬古開辟
蒙此一大議論通鑑綱目所為作也學者相承皆謂
其說本于程氏而范氏朱氏發之其實未然按唐史
沈既濟傳云既濟吳人以宰相楊炎薦為史館修撰
初吳兢撰國史為則天本紀次高宗下既濟奏議以
為則天進以強有退非德讓史臣追書當稱為太后
不宜曰上中宗雖降居藩邸本吾君也宜稱皇帝不

宜曰廬陵王睿宗在景龍間假臨大寶于誼無名宜
曰相王未容曰帝且則天改唐為周立七廟今以周
厠唐列為帝紀考于禮經是謂亂名中宗嗣位在太
后前而序年製紀反居其下方之躋僖公是謂不智
昔漢高后獨有王諸呂為負漢約無遷鼎革命事時
孝惠已歿子非劉氏不紀呂后尚誰與哉議者猶謂
不可魯昭公之出春秋歲書其居曰公在乾侯君在
雖失位不敢廢也請省天后紀合中宗紀每歲首必
書中宗所在以統之曰帝在房陵太后行其事改某
制紀稱中宗而事述太后名不失正禮不違常矣又

云太后遺制自去帝號及中宗上冊后之名不易今
祔陵配廟皆以后禮宜入皇后傳顯曰則天順武皇
后議不行而止蓋吳兢承遷固呂紀之誤歐公承兢
武紀之誤中間有一沈既濟健論卓識照映千古蓋
乞削去武紀者既濟也引公在乾侯例書帝在房陵
者亦既濟也其間此議在伊洛諸賢之先諸老先生
非掩人之善者偶未之見耳已未二月十九夜偶讀沈傳時年七十二許
由事不見于經故揚雄以為疑誠齋云子雲到老不
曉事不信人間有許由雖沉着痛快終未有以折衷
鄱陽前輩湯君錫獨曰堯始讓四岳四岳舉舜乃讓

於舜左傳云夫許太岳之後杜注云堯四岳然則太岳非由乎後人遂有洗耳之說爾援引切而說不鑿可謂之善讀書矣君錫名師中苦學強記既科第遽棄官亦不求岳廟以終其身與趙昌甫友善南溪柴公序其文人物高勝升伯仲能李庸之兄伯紀之父也瞻彼中林侯薪侯蒸古注云朝宜有君子而但聚小人韓嬰引晏子謂齊景公左右者為社鼠用事者為惡狗出則賣君效利入則託君不罪亂法君又并覆而有之此社鼠之患也人有市酒甚美之者至酸而不售問里人里人白公之狗甚猛人持器欲往狗

輒迎而齧之所以不售也士欲白萬乘之主用事者
迎而齧之此國之惡狗也此事與經文若不相涉而
深有發明他多類此

魯監門之女嬰相從績中夜而涕泣其偶曰何泣也
嬰曰吾聞衛世子不肖所以泣也其偶曰衛世子不
肖諸侯之憂也子曷為泣也嬰曰昔宋桓司馬得罪
于君出于魯其馬佚而驟吾園而食吾園之葵是歲
園人亡利之半旬踐攻吳諸侯畏其威魯往獻女吾
姊與焉兄往視之道畏而死越兵威者吳也兄死者
我也今衛世子甚不肖好兵吾能無憂乎韓引此事

解大夫跋涉我心則憂極有義味

與列女傳纖室女事大同小異

南有喬木不可休息漢有游女不可求思韓傳此章云孔子南遊適楚至于阿谷之隧有處子佩瑱而浣者孔子抽觴以授子貢曰善為之辭以觀其語子貢曰逢天之暑願乞一飲以表我心婦人對曰欲飲則飲何問婦人授觴挹之置之沙上曰禮不親授子貢以告孔子抽琴去其軫授子貢曰善為之辭子貢曰于此有琴而無軫願借子以調其音婦人對曰吾野鄙之人也五音不知安能調琴子貢以告孔子抽絺綌五兩以授子貢曰善為之辭子貢曰于此有絺綌

五兩吾不敢以當子身敢置之水浦婦人對曰客分
資財棄之野鄙吾年甚少何敢受子子不早去有狂
夫守之者矣信如此言是此女能以禮自防而聖賢
乃再三設詞以挑試之此前世陋儒之說而韓氏取
之謬矣

晉文公亡里鳧須從盜文公資而亡重耳餒不能行
子推割股肉以食然後能行及反國國中多不附里
鳧須造見曰臣能安晉國文公曰子尚何面目來見
寡人也里鳧須曰臣襲竭君之資而君以餒罪至十
族然君試赦之罪與驂乘遊于國中百姓見君不念

舊怨人自安矣文公從其計百姓皆曰里鳧湏且不誅而駢乘吾何懼也事在雍齒之前

楚熊渠子夜行見寢石以為伏虎彎弓射之沒金飲羽事在李廣之前

卜商從衛君而見趙簡子簡子被髮杖矛而見我君我趨而進曰諸侯相見不宜不朝服不朝服行人卜商將以頸血濺君之服矣簡子反朝服而見事在蘭相如之前

齊莊公出獵有螳螂舉足將搏輪莊公迴車避之而勇士歸之事在句踐攝怒蛙之前

孔子燕居子貢攝齊而前曰才竭而短不能復進請
一休焉子曰若之何其休也子貢曰君子亦有休乎

子曰闔棺乃止

語曰死而後已

君子避三端避文士之筆端勇士之鋒端辯士之舌

端

以上見韓詩外傳

東海有勇婦何慙蘇子卿學劍越處子超騰若流星
捐軀報夫讎萬死不顧生白及曜素雪蒼天感精誠
斬首掉國門蹴踏五藏行豁此伉儷憤粲然大義明
北海李史君飛章奏天庭含罪警風俗流芳播滄瀛
志在烈女籍竹帛何光榮按唐烈女傳逸此女子事

亦無姓名賴太白詩以傳李史君必邕也

世謂謫仙眼空四海然贈孟浩然云吾愛孟夫子上
李邕云宣父猶能畏後生大夫未可輕年少則盡尊
宿之敬與侍郎遊洞庭云三盃容小阮醉後發清狂
獻當塗宰從叔陽冰云吾家有季父傑出聖代英則
執子姪之恭集中與群衆兄弟從甥姪多所稱獎與
郡縣小吏如何判官云夫子今管樂未知判官何如
人而當此句崔司戶昆季云千金散義士四座無凡
賓欲折月中桂持為寒者薪必疎財好客者如崔秋
浦鄭溧陽皆比之陶令談少府劉少府皆比之梅生

其于人情世法亦甚委曲未嘗以金閨之彥青雲之士自居杜公氣象亦如此

上哥舒大夫述德陳情一篇其辭甚褒是先與哥舒有往還矣及流夜郎贈江夏韋守叙亂離事則云幽關壯帝居國命懸哥舒長戟三十萬開門納兇渠直書其罪曾不少恕與杜老同

繫潯陽獄上崔相三詩末篇云縱為夢裏相隨去不
是襄王傾國人此言迫脅而行非其腹心上客而或
者注云此一首恐非上崔相者誤矣送王屋山人魏
萬五言云十三弄文史魏亦有酬李翰林一篇見李

集云宣父敬項橐林宗重黃生則魏之年甚少亦可
見謫仙忘年折節處魏詩高自稱道與任華同二人
敢與李杜唱酬其瞻不可及矣

東武吟云白日在高天迴光燭微躬清切縈霄迴優
游丹禁通君王賜顏色聲價凌烟虹一朝去金馬飄
落成飛蓬贈送陟云早懷經濟冊特受龍頭顧白玉
棲青繩君臣忽行路二詩與杜公集賢學士如堵墻
觀我落筆中書堂往時文采動人主此日饑寒趨路
傍之作悲壯略同

古樂御使君謝羅敷可共載無羅敷前置辭使君

一何愚使君自有婦羅敷自有夫東方千餘騎夫婿
居上頭三十侍中郎四十專城居是羅敷之夫亦五
馬矣共載之間何使君之佻易也豈亦寓言如金吾
子之類耶

謝惠連擣衣篇云腰帶准疇昔不如今是非張籍殷
勤為看初著時征夫身上宜不宜張文潛別來不見
身長短若比小郎衣更長之句皆本此

玉臺新詠如是妾愁成瘦非君重細腰如絃斷猶可
續心去最難留如城中皆半額非妾西眉長如怨黛
舒還斂啼粧拭更垂有唐人精思所不能及者

尹和靖詩禮二三首其自秦入蜀道中云綠陰深處
竹籬遮也有紅花映白花却憶故鄉卿相第不及張
三李四家和靖洛人洛陽名園甲天下一旦蕩為劫
灰故其詩如此又一絕云南枝北枝春事休啼鶯乳
燕也念愁朝來回首頻惆悵身過秦川最盡頭亦甚
佳

自神放常秩後惟尹和靖得位最速然一生轉徙患
難全家死虜禍僅以身脫南渡再召已六十七歲不
兩年至從橐其峻擢以力拒偽齊亡命入蜀不專為
程氏高弟之故

秦少游嘗謫處州後人摘柳邊沙外詞中語為鶯花
亭題詠甚多惟芮祭酒一絕云人言多技亦多窮隨
意文章要底工淮海秦郎天下士一生懷抱百憂中
張天覺晚尤重釋老為華嚴閣醮錄會蠅黃皆歸之
了翁以詩代書曰辟穀非真道談空失自然何如勲
業地無愧即神仙天覺雖貴為宰相平生有愧多矣
若果如釋老之說竊意其昇天成佛必在了翁之後
或言了翁詩末句不該佛然佛亦謂之金仙后山云
稽首西
方鶴相海外書其稱子詞翰陶商翁有別才珙詩云風
霜慈母衣中線塵土先人壁後書珙乃鶴相之子必

好學者

陶商翁五言如梟鳴社旁樹盜發塚中金煉成丹竈
在騎去鶴巢空鹿飲沙渾水援饑菓落雲七言如將
老未聞金作印師寒猶用鐵為衣山險不能留霸業
水聲惟解送年華道近可憐駑馬駿時平不見布衣
雄之類皆可傳

朱新仲題元英舊隱云五季浪天不覆漢翁船語
意甚新不犯前人

屏山子魚詩云虐戲等割孕淫刑真戮孥茶山食蜂
兒云奪食已非義焚巢真不仁殺身緣底罪作偏定